

Planisaziun pastorala

Autor(en): **Demund, Giusep**

Objekttyp: **Article**

Zeitschrift: **Igl Ischi : organ della Romania (Societat de Students Romontschs)**

Band (Jahr): **58 (1973)**

Heft 1

PDF erstellt am: **15.08.2024**

Persistenter Link: <https://doi.org/10.5169/seals-882061>

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

Planisaziun pastorala

1. Enzacons datums

La cumissiun da planisaziun pastorala turitgesa edescha il zercladur 1971 sia broschura «Strukturmodell für die katholische Kirche im Kanton Zürich». Hans Cantoni, in dils editurs dalla broschura menziunada, presenta e discutescha, s'orientond vid il *model turitges*, pusseivladads per ina planisaziun da structura diocesana ils 15 da zercladur 1971 a Thalwil. Ils participonts dalla conferenza a Thalwil, ils decans digl entir uestgiu da Cuera ed enzacons laics, renconuschan la necessitad d'ina planisaziun pastorala diocesana. Els secunvegnan da formar enteifer la diocesa singulas regiuns e da planisar la pastoraziun da quellas cun proceder analogicamein al *model* scaffius dalla cumissiun da planisaziun dil *cantun Turitg*. Ils organs da planisaziun, la cumissiun da planisaziun diocesana e la cumissiun da planisaziun per la regiun dil cantun Grischun seconstitueschan ils 21 da settember 1971 a Cuera.

2. Il *model turitges*

La gruppa da specialists che ha elaborau il *model turitges* ha en emprema lingia formulau la finamira dalla lavur pastorala. La finamira generala dalla pastoraziun ei vegnida circumscretta sco propagaziun dil reginavel da Diu. Da cheu han ins deduciu tschun pensums capitals dalla pastoraziun, numnadamein annunziaziun, liturgia, dretg ed administraziun, pastoraziun e diaconia, survetsch el mund e vid il mund. Mintgin da quels pensums ei silsuenter vegnius dividius en pliras incumbensas generalas che selain tenor basegns detagliar vinavon en ulteriuras directivas parzialas. Ils iniziants dil *model turitges* constateschan expressivamein che lur catalog dallas finamiras pastoralas sebasei sin bien fundament teologic e sappi muort sia cumpleinadad ella diversificaziun survir a pleivs ed ad autras instituziuns religiusas sco manual.

La secunda part dalla lavur da planisaziun enumerescha e characterisescha ils purtaders dalla pastoraziun ella regiun dil cantun Turitg. Sco tals vegnan numnai il plevon, il cussegl pastoral parochial, ils organs administrativs dalla pleiv, il decanat, il vicari general, il cussegl pastoral cantunal e la cumissiun centrala, in organ semegliant al Corpus Catholicum en nies cantun.

Pensums e conluvrers pastorals vegnan ussa confrontai. Ins applichescha principis d'organisaziun daditg enconuschents ordeifer la Baselia e postulescha ina clara repartiziun dallas incumbensas e directives formuladas allas singulas instituziuns pastorals menziunadas. Plevons, organs da pleiv e cussegls pastorals parochials ein tenor il concept organisatoric presentau surtut istanzas da decisiun. Las preparativas che precedan il conclus sorprendan cumissiuns da lavur, medemamein la realisaziun che suonda la decisiun. Ils decanats ch'ins vul regionalisar sut aspects pli efficientes e meins arbitraris che tochen dacheu, sorprendan specialmeins pensums da coordinaziun. Ton ella pleiv sco el cantun ei il cussegl pastoral in gremi che cusseglia, *decida e realisescha*. Tuttas ulteriuras instituziuns existentas religiusas (uniuns, secretariats, casas ed asils religius) ella pleiv ed el cantun vegnan envidadas da cooperar.

Il model presentau duei vegnir realisau entochen igl onn 1980. Sin quei termin duein las propostas fatgas che pretendan reforma ed adattaziun daventar realitad. Quella finamira selai realisar cun accentuar durant il proxim decenni onn per onn mintgamai dus auters ressorts da lavur sco urgents. La gliesta da prioritad, che classifiescha l'urgenza dall'acziun els singuls ressorts, ei il resultat d'ina retscherca rappresentativa tiel clerus ed ils catolics dil cantun Turi.

Il project e sia realisaziun duei demussar en maniera concreta e detagliada ch'igl entir pievel da Diu ei cumpigliaus ed engaschus tier ina derasaziun universal ed intensiva dil reginavel da Diu. Quei mussament vul ins prestar per satisfar ad ina pretensiun teologica hodierna. La munconza da spirituals ei buc igl impuls primar per ventilar e fixar pusseivladads d'acziun e claras cumpetenzas en favur dil laic.

Prendend posiziun tier la planisaziun pastorala instradada, vi jeu persunalmeins ni s'inclinar en devoziun avon il model turitges ni scarpur el en tocs, sepustond silla sutga pulstrada. Per far laudavaglias ei il problem dalla planisaziun pastorala memia serius. Per critica fulminonta mauncan a mi il plascher e la qualificaziun. Mias remarcas en connex culla planisaziun pastorala ein fretg da reflexiuns persunalas necessariameins munglusas. Encunter quei pareri persunal sa e duei ins far objecziuns.

3. Cussegls pastorals e model planisatori turitges

Tut ils documents dil davos concil fladan in spert pastoral. Sapientivameins ni casualmeins ei il secund concil dil Vatican caracterisau d'ina tempra meins ductrinara che biars concils precedents.

Il postulat teologic e pastoral da participar sper il spiritual era il laic vid il reginavel da Diu ei per quei motiv vegnius formulaus pli perschuadentamein e propagaus pli intensivamein che zacu avon. Returnond da Roma han ils conciliars beinprest sentiu ch'il proclamar in principi pastoral ei ina caussa, il realisar quei postulat denton tut in'otra. Bein selain ils organs per activar la participaziun dil laic tgunschamein crear. Nies cussegl pastoral diocesan ei seconstituus igl onn 1967 senza breigia enorma. Quel ha beingleiti sez postulau organs semegliants per singuls cantuns, diversas regions e las pleivs. Cheutras ein ils organs per activar il laic vegni scaffs ton sco sur notg e disponan per part d'ina experientscha da plirs onns. Tgei muossa denton quella experientscha? Eis ei reussiu als organs scaffs per activar il laic da buca mo organisar quel, mobein era da tschaffar ed engaschar el?

A miu manegiar ei tochen oz il postulat conciliar da participar ed engaschar il laic realisau mo per part e per ina pintga minoritad. Il motiv persuentar schai surtut ella moda e maniera co laic e spiritual s'entaupan els gremis scaffs per lur cooperaziun. Il laic ha cumbinau cun sia collaboraziun pretensiuns per part exageradas. Plaunsiu e supprimend beinenqual illusiun ves'el ch'el sa buca agir en in cussegl pastoral tuttina sco quei ch'el agescha en ina cumissiun parlamentara ni ell'uniun, dalla quala el fa part. Il spiritual che cooperescha en in tal gremi vesa che la collaboraziun pretenda dapli ch'in tec bunaveglia e ch'el sto sepertgirar permanentamein dil prighel da duvrar il laic per ses intents segiramein buns. Naturalmein han quels aspects differents adina puspei empalau la discussiun viers la damonda centrala: Tgei schai atgnamein ella cumpetenza da tgi? Ina risposta clara, constructiva e generalmein praticabla a quella damonda enquer'ins tochen oz adumbatten. Ins registrescha en quei connex silpli in per paucas tentativas digl Ordinariat e da Roma, tentativas per part disgraziadas, per part catastrofalas. Ils editurs dil «Strukturmodell für die katholische Kirche im Kanton Zürich» han il grond meret da ver tractau da rudien gest la damonda dalla repartiziun dallas incumbensas e cumpetenzas e da ver anflau per quella damonda urgenta ina risposta madira e perschuadenta. Els han surpriu il postulat conciliar da participar il laic vid il reginavel da Diu ed illustrau en moda detagliada e concreta tgei che la realisaziun da quei postulat munta per la pastoraziun. Aschilunsch ch'il model da Turitg avisescha il laic e sia activaziun eis el a miu manegiar era per nossa regiun in beinvegnu muossavia.

4. *Resalvas enviers il model turitges*

La brochura che presenta il model turitges ei edida dalla cumissiun da planisaziun pastorala dil cantun Turitg. Il model turitges ei vegnius recumandaus allas ulteriuras cumissiuns da planisaziun pastorala dalla diocesa da Cuera sco manual. Quels fatgs pon leventar l'impressiun ch'il model turitges seigi en damondas da planisaziun pastorala ina sort fibla indispensabla da planisaziun. Tgi che etichettescha il model turitges cun fibla da planisaziun engascha quel per ina finamira, alla quala el po buca satisfacer. Igl integrar organs pastorals scaffa daniev e dacuort ella structura tradiziunala dalla Baselia, il proponer repartiziun in'efficienta dils pensums pastorals hodierns sin tut ils purtaders existents dalla pastoraziun sa esser ina premissa necessaria per ina planisaziun pastorala. Cun planisaziun el senn cumplein dil plaid ha quei tut denton mo in connex indirect. Il model da Turitg plaida bein digl onn 1980 sco termin per la realisaziun finala dallas finamiras involvidas en siu concept. Quei daventa denton buca en quei senn ch'ins sedamonda, co las incumbensas pastorales momentanas vegnan a sesviluppar enteifer il proxim decenni e tila ordlunder directives per l'acziun previda. Fixond igl onn 1980 sco termin da realisaziun resalv'ins sulettamein in spazi da temps d'in decenni per realisar quei ch'ins anfla cheu ed uss per giavischeivel e necessari. Resalvas temporales per tals intents ein concessiuns tactics e buca enzennas da tenuta prospectiva, in aspect essenzial per tutta planisaziun.

Per la repartiziun dallas incumbensas pastorales sils singuls purtaders dalla pastoraziun lavura il model turitges cun criteris classics dalla doctrina d'organisaziun derasada ell'economia privata. Ils criteris necessaris per quei proceder vegnan erui cun analizar in'acziun en sias funcziuns parzialas. Talas ein la funcziun da planisaziun, la funcziun da lavur preparatoria, la funcziun da decisiun, la funcziun da realisaziun, la funcziun da coordinaziun e controlla.

Tier in'acziun concreta sorprendan differentas instanzas ina u pliras funcziuns parzialas. Aschia ei, per numnar in exempel pratic, il cussegl pastoral d'ina pleiv l'istanza da decisiun per damondas da caritas. Per la lavur preparatoria e la realisaziun da projects en quei ressort postulescha il model da scaffir in'atgna gruppa da lavur subordinada al cussegl pastoral. En quei connex ston ins menziunar che bia observaziuns ch'ins ha fatg novissimamein ell'industria plaidan plitost encunter che per il sur-schar la decisiun e la realisaziun d'ina acziun a differentas instanzas. Ins constatescha ch'ina istanza cumpetenta per la decisiun decida auter e meglier, sch'ella ei el medem temps responsabla per la realisaziun d'in

project. Ins registrescha era che l'istanza cumpetenta per la realisaziun s'engascha pli intensivamein, sch'ella posseda sper la funcziun da realisaziun era quella da decisiun. Cun curreger ils criteris da repartiziun en quella direcziun seschass in'inflaziun da cumissiuns, gremis e gruppas da lavur evitar. Quei savess esser in basegns gest en nosssa regiun, nua che las singulas pleivs han buca dimensiuns quasi illimitadas sco el cantun Turitg. Quei savess era esser in basegns, sch'ins patratga vid la da-monda, tgei che duei schabegiar el futur cun tut las uniuns religiusas gia existentas. Las uniuns religiusas existentas vegnan tractadas da schenderletga entras il model turitges. Ins serestrenscha sin in'invitaziun allas uniuns da cooperar e gnanc fa l'emprova d'integrar ellas el model e d'intercurir lur dretg e lur aspects d'existenza pil futur.

La gliesta da prioritad che classifichescha l'urgenza d'acziun els singuls ressorts duront il proxim decenni ei, sco gia constatau, il resultat d'ina retscherca tiel clerus ed il pievel catolic dil cantun Turitg. Tier la retscherca exequida cun metodos sociologicas secumprovadas ha mintga interrogau retschiert ina gliesta da 19 pensums pastorals e l'incumbensa d'indicar tgei pensum che seigi da sliigar sco emprem, tgeinin sco secund e.a.v. Il resultat final da quella rangaziun muossa che la Baseligia catolica dil cantun Turitg vul realisar il pli emprem tuts postulats en connex culla formaziun religiusa. Sco problems che ston vegnir tractai urgentamein, denton buca fetg urgentamein, taxesch'ins el cantun Turitg damondas da liturgia (rang 10), problems ecumens (rang 11) e problems dallas misiuns e digl agid internaziunal (rang 12). Buca schi spert paran ils catolics turitges da vuler s'occupar dils suandonts temas: Pastoraziun dil luvrer e hosp jester (rang 15), il ressort lavur ed economia (rang 17) ed il ressort politica e pressa (rang 19). Sco usitau muossa quella retscherca bia, igl essenzial zuppenta denton era ella.

Il resultat dalla retscherca lai buca eruir ils motivs ch'ei stai decisivs per la rangaziun ch'ei succedida exclusivamein sut aspects d'ina urgenza temporara. Igl ei per mei, ch'enconuschel fetg mal la Baseligia turitgesa, perquei quasi nunpusseivel da trer ord la retscherca conclusiuns evidentas davart il maletg da Baseligia ch'il catolic turitges posseda. Tuttina para la retscherca fatga d'indicar che la Baseligia turitgesa ei ualti introvertida e fixada oravontut sin ses problems interns. Sco laic damondel jeu il teolog, schebein el sa sefraternisar cul patratg da cementar ina tala vesta dalla Baseligia en in program d'acziun concepius e precisaus per in decenni?

Giusep Demund